

Die Bärg ond Chliepuure e de Schwyz die Vermuetig lit dernäbe
die kämpfe scho vor de EG 91 emmer meh oms überläbe
chönnte die jetz ned als Näbeverdienst e Form vo Polizeschte
be de Bundesverwaltige go Karteye uusemeschte

Do händ doch am Wältcöprene z`Kitzbüehl so Dooble em hoche Booge
de meishti Schnee vo Osswärts här an Hahnenkamm anefloge
wo de Bundesrot Velliger das het gseh ghörschen freudestrahlend huuche
jetz hani ändli es Argumänt wiso mer die F 18 bruuche

Sed d`Sitte ond nach em Tschuttimatsch es weisses e jedes Chend
d`Wettiger Fuessballspeler we weld of de Schiedsrechter los send
ond en bedrängt händ wie verrockt das er fascht het müesse stärke
düend sech laufend Herre vom andere Ufer als Schiedsrechter bewärbe

Er lueged secher am Sonntag zobe ame au em RTL Tutti Frutti
do chasch denn en huufe Fraue gseh azogni ond au blotti
ond brengt s`Schwyzer Fernseh mol öppis über Sex hets Lüt wo ufbegähre
ich fend mer set die Säbe halt mol zersch richtig ufläre

Wells de Lüt e de Omgäbig stenkt nei es esch ned zom Lache
duet`mer de Reichhold Chemie e sache Gstank Vorschrefte mache
ond die Gsetz die wärde emmer stränger es werd no sowit cho
das eine als Arbeiter det kein meh dörf fahre loh

De Volglade em Ennerdorf mer set em Eigetömmmer eis haue
werd wenger secher alli gseh händ för tüürs Gäld ombaue
do wärde sovel Stötz drenine gsteckt ond das bringt mech zom gompe
das de Volglade em Osserdorf deswäge het müesse verlompe

D`Riniker Behörde die hät gärn gha e neus Gmeifahrzüg hür
mer heigi au eis en Ussecht gha doch das sig gsie veel z`tüür
doch jetz heigs glich no ne Lösig geh nach langem Hoore raufe
mer chönni vo de DDR schiends gönstig en Trabant chaufe

De Hueber het de Röcktritt geh er wot zom Gmeirot us
do chörzlech vor de Wahle lütetz ar Töre vo sim Hus
die 3 bliebende Röt händ en bestörmmt chom weder mer tüend ned g`spasse
mer händ vernoh d`Koller ond de Äberli die chönne schiends ned Jasse

Die Algepest a der Adria do hauts`di os de Socke
do bruchsch nömmme för tüürs Gäld of Italie an Strand go hocke
nei do chasch nähmli grad so guet z`Rinike en Dorfbachweiher
gratis go n`es Schlammbad neh em Öl vo de Ferma Treier

S`het wägem Asylantechalet es Boukonsortium lisproch erhobe
beförchte die Herre s`glich Problem wo die händ of em Bözbärg obe
det händ d`Asylante reklamiert wo send Schwimmingpool ond Flemmercheschte
ond wiso händs be de Mercedes über 3 Jahr Leferfreschte

Ar Fasnacht du do flipp ich us ich tue of Pauke haue
Jubel Trubel Heiterkeit er Bude machi blaue
ond send die tolle Täg de verbie er wärdets ned errote
han ich den en Grend wie die Tüpe of de neue Banknote

Der Komedi⁹⁰

Wänd er me bsueche? Ich be dehei onder „www.komedi.ch“